








Calla got














LA
PITARCHIE
FRANÇOISE:
OV
RESPONSE
AUX VAINES
PLAINCTES DES
mal-contens.



A PARIS,
Chez Gilbert le Veau, rue S. Iean de
Latran, pres le College de
Cambray.

1615.

Case

F

39

.B26

1615 air

THE NEWSPAPER
LIBRARY



LA
PITARCHIE FRANCOISE:
OV
RESPONSE
AUX VAINES

plainctes des mal-contens.



En tous les abus & desordres dont se plaignent aujourdhuy le plus parmy nous quelques vns, qui n'en desirent possible pas tant la fin pour le bien public, que le changement pour leur interest particulier, ie ne scay s'il y en a vn plus grand que ceste licēce dēbordēe que prend vn chacun de parler & d'ēcrire de la reformation de l'Estat. Tout le monde se mēse d'en dire son aduis aux coings des ruēs. Tel porte ses opinions & censures là dessus jusques dans le Cabinet, qui n'a peut estre de sa vie osé se presenter à l'antichambre de peur d'estre repoussé par l'huissier. On

n'entend , on ne voit autre chose depuis quelques mois que discours , & que liures sur ce sujet. Les vns & les autres également remplis , d'autant d'impudēce que d'impertinēce. Vous diriez qu'il y a vn prix proposé à qui criera plus fort contre le gouuernement public. C'est à qui sera le plus hardy. Insolence déjà montée à tel comble par l'impunité dont elle a esté fomētee jusqu'à cette heure, que si on ne la reprime promptement par la rigueur & seuerité des peines, il y a danger tres-grand que la tranquillité publique n'en soit alteree. Ce sont autant d'allumettes de diuision , autant de trompettes de sedition ; Ceux qui desirerent de remuer dans vn Estat , commencent ordinairement à disposer sourdemēt les peuples à leurs desseins par telles procedures. Les hommes aiment naturellement à ouir médire, & n'y a rien qui se coule plus doucemēt dans les oreilles de la multitude que la calomnie couuerte d'vn faux pretexte de franchise & de liberté. Pour vn qui aura la prudence de recognoistre la

verité à trauers les déguifemens de la malice , il y en aura cent qui ſe laiſſeront ſurprendre & ſeduire à ces artifices. Artifices qui engendrants és eſprits vne fois abbreuuez de leurs impreſſions le mépris de ceux contre leſquels ils ſont dreſſez, diminuent grandement ce reſpect qui eſt le plus fort & le plus durable lien de toute obeifſance legitime. C'eſt pourquoy on a touſiours és Eſtats mieux policez puny du dernier ſupplice les ſimples diſcours qui effleurent tant ſoit peu la reputation ou l'autorité du Souuerain. La legereté ſeule d'une parole mal à propos échappée ſans aucun deſſein malicieux, y a quelquefois couſté la teſte à celuy qui l'auoit proférée. I'en pourrois rapporter icy beaucoup d'exemples de routes nations & de tous ſiecles, ſi c'eſtoit choſe neceſſaire. Celuy d'Almanzor Roy d'Afrique, renommé d'une égale valeur & prudence, eſt memorable ſur ce ſujet. Il auoit enuoyé en Eſpagne nouuellement par luy conquiſe ſur Roderic, vn grand personnage & l'un de ſes plus confi-

dēts seruiteurs nommé Mahauia: Ceu-
 tui-cy ayant durant son voyage ren-
 contré du costé de Calis en vn lieu
 fort desért, vne jeune Dame d'assez
 bonne grace, toute seule, la tance de
 ce qu'elle auoit osé se mettre de la for-
 teen chemin. Ellé luy répond, que
 tant qu'Almanzor viuroit on pouuoit
 aller en toute asseurance où que ce
 fust. Estant de retour en Espagne il en
 fait entre autres choses le rapport à
 son Maistre, qui luy demande quelle
 repartie il auoit faite là dessus. Qu'elle
 estoit bien mal aduisee, répond Ma-
 hauia, de se fier à cela, veu que si quel-
 qu'un eust entrepris de la forcer en ces
 lieux-là, vous en estiez trop esloigné
 pour la deffendre. Parole trouuee si
 mauuaise par ce Prince, qu'il le ren-
 uoye tout de cépas là sous vn faux
 pretexte en Espagne; où estant arriué
 il fut, suiuant la lettre mesme qu'il auoit
 portee, condamné à estre empalé au
 lieu mesme où auoit esté faite la ren-
 contre; Et portoit l'arrest, ainsi que le
 cryoit tout haut vn qui marchoit de-
 uant luy, quand on le conduisoit au

supplice , que c'estoit pour auoir osé
 diminuer en la creance de cette Da-
 me la confiance de l'autorité & de la
 iustice Royale. Mais sans aller si loing,
 celuy qu'on fit mourir il y a quelques
 anneés deuant Ostende assiegee, pour
 auoir dit après en auoir considéré
 les deffences, qu'il y en auoit encore
 là pour long temps, est vn témoigna-
 ge que les autres nations chastient la
 temerité de telles paroles bien plus ru-
 dement que nous, qui souffrons que
 tout le monde parle de tout, en tout
 temps & en tout lieu. Nous auons oüy
 ces iours passez vne Cassandre effaree
 & vn ie ne sçay quel malicieux pleu-
 reur, qui hastans par malheureux &
 sinistres presages les mauuaises desti-
 nees de la France, déchirent par tou-
 tes sortes de calomnies plus sanglan-
 tes l'honneur de ceux qui en ont la prin-
 cipale conduite, & décriants de la fa-
 çon ou la foiblesse ou l'iniustice du
 Souuerain en la personne de ses Mini-
 stres, ouurent manifestement la por-
 te à quelque émotion intestine. Pour
 moy ie confesse librement, qu'ayant

remarqué tant d'ignorāce conjointe
 avec tant d'animosité dās leurs écrits,
 ie n'ay peu moderer le iuste senti-
 ment de ma colere contre l'impuden-
 ce trop hardie de telles gens. Mais où
 est la patience, tant grāde qu'elle soit,
 pour supporter les equippees & faillies
 furieuses de ces esprits fanatiques, qui
 pensans acquerir la reputation de bōs
 François parmy les factieux, n'acque-
 rent autre chose que le renom de fa-
 ctieux parmy les bons François? Per-
 sonne qui les ait leus, s'il n'a le tymbre
 de la teste fessé, n'en fera autre iuge-
 ment. Ils ne font certes pas tant paroi-
 stre en cela leur zele que leur fureur.
 Car s'il y a quelque mal couuert, quel-
 que vlcere secret en l'Estat, qu'est-il
 besoin de l'exposer à la veuë & conoi-
 sance du peuple? Que feroit vn ban-
 quier à ses courratiers qui iroient pu-
 blier sur la place l'incommodité de
 ses affaires domestiques? Les affaires
 du mōde se maintiennent le plus sou-
 uent par la reputation & par l'appa-
 rence. En découurant l'indisposition
 de cet Estat, corrompu, si on les veut
 croire,

croire, en toutes les parties, on attire peut estre sans y penser la hardiesse ambitieuse de quelcun de nos voisins à faire profit de sa foiblesse.

Mais, dira-t'on, verrons-nous ruiner miserablement nostre patrie faute d'en decouvrir les ennemis, & de reveiller & picquer par nos plaintes le soing & le courage de ceux qui ayants plus d'interest à sa conservation, y peuvent aussi plus contribuer ! Ainsi se perdit anciennement la ville d'Amycles. Je répons en vn mot à celà, que tant s'en faut que ie condamne l'affection des gens de bien enuers l'Estat, qu'au contraire ie la loüe grandemēt, comme elle merite, ie la recompenserois mesme, si ie pouuois ; mais il faut qu'elle soit conduite par les regles de la prudence, autrement elle est blâmable, elle est punissable. Or l'vne des principales regles en ces matieres, est d'aduertir secretement ceux qui sont constituez és charges publicques de ce qu'on estime estre important à l'Estat, à fin qu'on y mette ordre, & non pas de le faire retentir dans les oreilles.

du peuple , pour l'exciter à quelque sedition. L'autre, de soubmettre son iugement avec respect & obeïssance à tout ce qui est ordonné sur telles choses par l'aduis de ceux ausquels la lōy publique en defere la connoissance. Ce qui est vne fois concerté & delibéré au Conseil d'Estat en affaires graues & importantes, comme sont celles qui vont au general du Royaume, ne peut estre non pas blâmé, mais seulement disputé en public sans crime de leze Majesté. La loy des Achæains défendoit soubz grosses peines de reuoker en doute ce qui estoit passé par les voix du Senat. Et les Lacedemoniens estoient si jaloux de l'autorité publique, que dès que quelque resolution auoit esté prise au lieu accoustumé, elle n'auoit point de plus fermes & plus roides defēseurs que ceux là mesmes qui l'auoient auparauant combattuë. Quelle est donc l'imprudence de ces gens-cy, qui mesurants toutes choses à leurs passions, osent condamner à haute voix ce qui a esté solennellement arresté, selon les for-

mes accoustumees, au Cōseil du Roy? Mais quel Conseil? Certes où la Reyne tient, suivant le pouuoir que sa Majesté luy a donné, le rang qu'elle merite. Ce que quād j'ay dit, ie pense auoir tout dit. Car nous auons de si certains ostages de la prudence & bonté de cette grande Princeesse en cette longue & heureuse paix, dont nous auons jouïy durant sa regence, que sa volonté seule nous doit estre vne touche infailible du bien public. C'est cette benigne & sage Deesse, que les anciēns ont assise au costé de Iupiter. Elle est outre cela secondee de l'assistance de Monseigneur le Prince, de la sagesse & moderation duquel en toutes ses actions la France ne se peut promettre que toutes choses grandes & dignes de son extraction tres-illustre. Suiuēt apres Messieurs les autres Princes, Cardinaux, Ducs & Pairs, Officiers de la Couronne, & tout ce long ordre de ceux auxquels la coustume ancienne du Royaume donne seance dans le Conseil es deliberations publiques. Je demande maintenant où est le front

de ceux qui ne craignent point de blâmer les resolutions concertées par le consentement de tant de grands & signalez personnages, recommandez d'une exquisite suffisance & probité. Car de dire que la plus-part d'entre eux ne les ont jamais approuvées, le témoignage qu'en rendirent ces iours passez d'un commun accord dans le Louvre ceux qui se trouuerent autour de leurs Majestez, quand elles receurent les dernières remonstrances du Parlement verifie tout le contraire. Mais c'est qu'on en veut particulièrement à quelques uns d'entre eux, sur lesquels on tâche de rejeter l'enueie de tout ce qu'on estime pouuoir estre plus desagréable au peuple. Personnages de la fidelité, capacité & dextérité desquels en toutes sortes de grandes affaires le feu Roy, Prince incomparable en la cognoissance des hommes, auoit receu de si certaines preuues, qu'il les auoit par une cōfidente communication de ses intentions plus secretes comme associez à la Royauté avec soy, Avec eux, comme Iules Cæ-

far avec Pædius & Balbus, & comme
 Auguste avec Mecenas & Agrippa, il
 conféroit priuément & resoluoit pru-
 demmēt ce qu'il estimoit deuoir estre
 caché à la cognoissance de beaucoup
 de gens. Si la Reyne a suiuy son exem-
 ple en cela, comme en beaucoup d'au-
 tres choses, elle n'en peut estre blâmee
 que par ceux qui sont marris qu'elle se
 serue de personnes ausquels la paix &
 tranquillité publique plaist trop lon-
 guement. Mais il y a, dit-on, beau-
 coup de plaintes contre eux; Iem'e-
 tonne certes, qu'il n'y en ait encore
 dauantage contre des gens qui n'a-
 yants autre regle de leur deuoir que
 l'vtilité publique, sont contraints de
 perdre les bonnes graces de tous ceux
 qui ne peuuent rien gagner sur le droit
 par leur faueur. Monstrez-moy quel-
 cun qui constitué en places sembla-
 bles aux leurs n'ait point esté heurté
 de semblables secouffes, & ie vous
 monstrey vn prodige. Et puis qui ne
 sçait que l'enuie accōpagne toujours
 ces grandes dignitez, comme l'ombre
 les corps? Mais quiconque épluche-

ra avec vn esprit paisible & tranquille
leurs conseils & leurs deportements,
fera contraint sans doute de recognoi-
stre que les gens de bien leur ont vne
tres grāde obligatiō. Vn ancien mede-
cin après auoir attentiuement confi-
derè la structure, l'action & l'vsage des
parties du corps humain, donnoit à
Epicure qui rapportoit la conforma-
tion d'vn si bel ouurage au choc for-
tuit des atomes, le terme de cent ans
pour y trouuer quelque chose à chan-
ger en mieux. Je pense qu'on pourroit
transférer ce mot-là des choses aux
personnes, & qu'on seroit bien empes-
ché, aussi bien que ceux de Capouë
autrefois, de choisir des hommes plus
capables de la conduite & de l'admi-
nistration publique. Il faudra percer
des siecles entiers pour en rencontrer
de semblables. Non qu'il n'y ait des
confusions & desordres plus qu'il ne
seroit à souhaitter; car qui ne les voit?
mais si vne vieille carraque fait eau de
beaucoup d'endroits, ce n'est certes
pas la faute des nautonniers. Il y en
auroit encore dauantage si d'autres

eussent occupé les places qu'on leur enuie tant. Ils n'ont pas introduit les abus qui y sont; Que s'ils ne les ont pas aussi redressez, c'est que le temps n'y a pas encore esté propre. Car les medecines mesmes les plus salutaires ont certaines saisons, lesquelles si on ne prend bien à propos, au lieu d'adoucir le mal, elles l'empirent. Et certes à quiconque pesera meurement toutes choses, il paroistra clairement, que si y a quelque chose de bon au gouvernement de l'Estat, il le faut rapporter à leur prudence, si quelque chose de mauuais, à la disposition des affaires. A cela on oppose les alliances d'Espagne traictees depuis trois années seulement. Car c'est là dessus que cette folle Cassandre entre en auertin, qu'elle donne l'allarme au peuple, & qu'elle se cabre contre le Louure. De luy demander sur quoy elle fonde ces grandes & viues apprehensions de l'aduenir qu'elle a hane tant de donner à ceux qui luy ressemblent, ce seroit, comme dit celuy-là en vne ancienne comedie, vouloir enrager avec

raison. Les Espagnols, disent quelques vns, ont este nos ennemis. Le l'aduouë, & nous aussi les leurs, comme ie pense. Mais pour cela ? Quelle nation ne l'a esté quelquesfois l'une de l'autre ? Combien de fois auons-nous armé contre les Italiens, contre les Alle-mans, & plus encore contre les Anglois ? Avec lesquels neantmoins si non autre chose, pour le moins la lassitude des malheurs de la guerre nous a reconciliez à la fin. Le traicté de Veruins ne termina-t'il pas nos contentions avec ceux dont il est question maintenant ? Traicté tres-fidelement obserué d'une part & d'autre jusqu'à cette heure. Or ne voy-je point de raison qui défende de faire mariage avec ceux avec qui on a fait la paix. Ils detiennent, repliquent-ils, tant de belles pieces de la maison de France. Autant en pouuoit on dire apres le siege d'Amiens. Car ils n'ont point raccourcy nos frontieres depuis. Mais comme nous ne renonçâmes pas lors à nos droits, aussi ne faisons nous pas non plus maintenant. Il n'est pas dit que
 nous

nous n'en demandions, que nous n'en tirions encore raison, quelque iour en temps & lieu. Qui nous en empeschera ? Qui demande le sien ne fait tort à personne. Et qui sçait si cette confederatiō plus estroite ne nous en pourroit pas ouurir & faciliter les moyens ? L'amitié nouuelle qui succede à vne vieille haine a quelquesfois vne telle force sur les esprits, qu'elle y fait des miracles non preuëuz, non attendus. Les Princes ont souuent des mouuements extraordinaires, qui produiroient de tres-bons effets, s'ils estoient aidez & cultiuez par la prudence & dexterité de quelque confident. Vne fille de France au costé d'un Roy d'Espagne peut procurer à la patrie par cette douce communication des affectiōs conjugales ce qu'il seroit fort difficile d'obtenir par autre voye. On se mocquera de cela, ie le preuoy; mais combien de choses arriuent au monde contre l'opinion de tout le monde ? Il en arriue de plus estranges tous les iours. L'ambition de regner est grande, à la verité, & ne vieillit que fort

tard sur ces testes couronnees : mais la conscience a par fois des aiguillons si vifs, & si poignants, quand il plaist à Dieu de la toucher, qu'il est impossible à l'homme de s'en défendre. La Côté de Roussillon, qu'un de nos Roys leur a autrefois renduë par l'aduis de son confesseur, est vn exemple à eux de ce qu'ils doiuent, à nous de ce qu'ils peuuent faire. Mais donnons querien de cela n'aduienne, comme c'est de vray chose fort incertaine & douteuse ; faisons au moins quelque chose pour le bien commun de la Chrestienté, si nous ne pouuons rien pour le nostre particulier. Car qui doute que ces deux grands & puissans Royaumes conioints vne fois par le doublenœu de ces alliances ne tiennent tout le reste de l'Europe en tel contrepois, que tout ce qu'il y a de plus fier, de plus orgueilleux, de plus remuant d'une mer à l'autre ne soit contraint de prendre la loy d'eux ? Ie representerois le fruiet que l'Eglise pourroit receuoir de leurs communes armes tournees contre le Turc ; si la corruption vniuerselle du

siecle n'auoit tellement affoibly en
 nous l'ancien zele de nos peres , que
 nous ne faisons meshuy ny mise ny re-
 cepte de la gloire de DIEU, si ellen'est
 conjointe avec nostre vtilité particu-
 liere. La France & l'Espagne se sont
 autresfois allies pour Galba contre
 Neron, ainsi qu'on les voit encore en
 quelques vieilles medailles se tenants
 par les mains; Combien leur seroit-ce
 chose aujourd'huy plus vtile, & tout
 ensemble plus glorieuse de se voir en-
 core vne fois vnies contre l'oppression
 tyrannique des Ottomans pour l'exal-
 tation de cette foy dont elles portent
 les tiltres & prerogatiues avec plus
 d'ambition, ie l'ose dire, que de droit
 & de raison. Car ny l'une ny l'autre
 ne cherchent plus, il y a long temps,
 que leur accroissement, que leur pro-
 fit aux depens de celuy mesme de la
 protection & faueur duquel depend
 entierement leur conseruation & sa-
 lut. Peut estre qu'elles feront mieux
 à l'aduenir. Mais il y en a qui s'imagi-
 nent vne telle diuersité d'humeurs en-
 tre ces deux nations, qu'il est impossi-

ble qu'elles puissent jamais compatir. Comme si la religion Chrestienne, qui ne presche, qui n'enseigne, qui ne commande, que la douceur, que la concorde, que l'union auoit depuis ce temps-là alteré leurs dispositions. Et qui ne sçait les longues & estroites confederations qui les ont liées de Roy à Roy iusqu'à la derniere entreueüe de Bayonne, il n'y a guiere plus de cent ans? On n'en liët, on n'en remarque point de semblables entre aucuns peuples que ce soit. Les formes en estoient extraordinaires. Que si ie voulois faire icy vn dénombrement des Alliances par mariage entre ces deux maisons, ie me pourrois monstrier aussi sçauant en l'histoire, que ceux contre lesquels ie parle, en sont ignorants. Nos Annales & les leurs en sont toutes pleines. Mais i'oy, ce me semble, les voix confuses de quelques-uns, qui me respondent que le temps a bien changé. Que la Castille n'aspiroit pas lors à ceste Monarchie vniuerselle de l'Europe, dont elle a depuis ambitieusement embrassé l'espe-

rance, tesmoignée par la deuise qu'il le-
 ue les bornes d'Hercule. C'est ce qui
 leur faict apprehender, ce qui leur fait
 craindre ce traicté. Mais outre que,
 & l'entre-prise de Prouence & le siege
 de Metz leur ont assez appris à leurs
 dépens qu'il n'y a rien a gagner pour
 eux sur nous, ie ne vois certes point,
 que quand quelque mauuais conseil
 les poufferoit à faire vne nouvelle
 équipée sur nos marches, leur Infan-
 te assise auprès du Roy dans le Louure
 peust en quelque façon que ce fust
 fortifier leur entreprise. En seroient-ils
 plus hardis, en serions nous moins
 puissans pour cela? C'est ce que ie n'ay
 peu comprendre, ie l'aduoüe, iusqu'à
 cette heure. En tout cas, pourquoy est-
 ce que Madame ne nous donneroit
 pas le mesme aduantage sur eux en Es-
 pagne? Cest des menees & trames
 couuertes volontiers qu'ils veulent
 parler. Je les entends. Mais tousiours
 faut-il qu'ils nous monstrent, s'ils peu-
 uent, en quoy ce mariage les pourroit
 fauoriser. Certes non seulement ceux
 qui ayment, ainsi que dit le Poëte La-

tin , mais aussi ceux qui craignent se forger des songes. Ce sont vaines apprehensions & terreurs Paniques. Car de se figurer vn conseil estroit d'Espagnols dans le Cabinet , comme font desia quelques-vns, comment l'endureroient ceux qu'ils accusent aussi fausement que malicieusement de n'auoir procuré ces Alliances que pour se maintenir en leur autorité? Il n'est pas besoin de combattre avec vn plus long effort des gens qui s'enferment de la sorte eux-mesmes de leurs armes. Puis comment laisseroit-on prendre ce pied à sept ou huit Castillans en vn lieu, ou a peine a-on peu souffrir l'establissement d'vn seul Florentin?

Car on sçait quels bruiets , quelles calomnies l'enuie a opposees à sa fortune naissante. Mais cela luy est commun avec tous ceux que la faueur du Louure a éleuez a quelque éminente condition. Que n'at-on dit, que n'at-on escrit contre les mignons de nos derniers Roys? Le peuple n'auoit point assez d'injures, assez de maledictions pour les charger. Et comme on gra-

uoit les Hermes anciennement en Athenes sur le modele du visage d'Alcibiade, on tiroit de mesme le pourtraict des Démôs ennemis de la France sur le leur. Ils se sont maintenus pourtant contre tous ces heurts, & ont depuis en diuerles occasions par de tres vtiles & importants seruices tellement racheté la bien-veillance de ceux-là mesmes dont ils auoient auparauant attiré la haine sur leur aggrandissement, qu'on admire encore aujourd'huy leur aussi sage qu'heureuse conduite. Ne doutons nullement que cestui-cy n'en fasse avec le temps de mesme; Il est estrangier, dit-on. Et d'où? De la Zamble volontiers, où du Bresil? Certes, comme ce grand Medecin disoit, toutes les parties du corps quoy que fort differentes, deuenir en quelque façon, vne par la peau qui les couure, de mesme pouuons nous dire, toute la terre n'estre, ainsi qu'estimoit Alexandre, qu'une cité par le moyen du Ciel dont elle est de toutes parts entouree. Mais ces considerations sont trop hautes pour gens

qui ne veulēt rien voir au dessus d'eux. Qu'ils nous permettent au moins de disputer si on peut avec raison appeler aubains ceux que l'alliāce de deux tres-heureux mariages outre la proximité du voisinage, telle qu'un chacun sçait, semble avoir vnisauec nous. Faisons mieux, accordons-leur ce qu'ils disent; Que s'en ensuit-il? Auons nous quelque Loy en France qui defende d'appeller quelquesfois ceux qui y viennent de dehors aux charges & dignitez du Royaume? Et d'où estoit ie vous prie, le Marechal Triulce, d'où le Marechal Strozze, d'où le Marechal de Rets, d'où le Marechal d'Ornane? Ie ne parle que des Italiens, & de ceux que nos peres ont peu voir. Ie passe sous silence les Escossois, & tant d'autres qui y ont il y a long temps tenu les principaux Offices de la Couronne, jusques à celui de Connestable, qui est le sommet & le comble des honneurs militaires. Mais où sont les François, disent-ils, qui se soiēt iamais aduancés de la sorte chez nos voisins? Premièrement j'estime qu'il

ne seroit pas beaucoup mal-aisé d'y en
trouuer à qui voudroit se donner la
peine d'y en chercher; car, sans faire
mention de ce Gentil-homme Nor-
mand, qui fut Connestable de Suede,
il y a plusieurs grandes familles & en
Italie & en Espagne & ailleurs qui sor-
ties àutresfois de France se sont pro-
uignees en ces pais-là sous les rayons,
comme il est vray semblable, de quel-
que plus douce & plus fauorable for-
tune. Et quand il ne s'y en trouueroit
point, il ne faudroit pas incontinent
estimer en cecy les autres peuples plus
sages, mais seulement moins courtois
que nous. La France est de tout temps
recommandee d'une singuliere beni-
gnité enuers les estrangers, louee par
ceux là mesmes qui ne l'ont iamais
ressentie. Et puis où aller chercher ce
qui ne se trouue point en vn grand &
puissant Royaume comme celuy-cy,
tellement abondant en toutes sortes
de commoditez & delices que tout
le reste de la terre n'a rien qui luy soit
comparable? L'Italie est estimee vne
des plus belles parties de l'Europe, &

la contree de Naples le plus doux & le plus agreable sejour de l'Italie. Neantmoins ceux là mesmes d'entre les nostres que la faueur & bien-vueillance de nos Roys y auoit autresfois esleuez lors qu'ils en estoient maistres, ne s'y pouuoient, à ce que nous en apprenons, tellement laisser attacher par la consideration de leur aduancement, qu'ils ne tournassent à tous coups la veuë avec la pensee du costé de leur patrie; de laquelle ils protestoient à leurs amis par toutes leurs lettres ne pouuoir plus longuement supporter l'absence. On les voyoit tout aussi tost reuenir l'un apres l'autre, comme oiseaux essoréz, sur le poing. Le souuenir de cette franchise, de cette liberte, de cette douceur Françoise, à laquelle il ne se trouue rien de semblable ailleurs, estoit le leurre qui les reclamant aux lieux de leur naissance, leur faisoit preferer les habitudes domestiques à toutes grandeurs estrangeres. La fortune estât vne femme, veut estre courtisée avec autant de patience que d'industrie; C'est pourquoy l'humeur de

nos hommes brusque, prompte, ouverte, & qui ne peut rien moins souffrir que des longues esperances, les rend autant incapables de s'advancer que d'attendre. Mais c'est assez sur ce propos, pour monstrier que la rareté des nostres qui s'éleuēt hors leur païs, procede ou de la commodité qu'ils ont de trouuer auprès d'eux plus qu'ils ne feroient ailleurs, ou de leur impatience naturelle, pluſtoſt que de la ſeuerité de nos voisins. La pluspart deſquels ne mettent autre diſtinction entre le naturel & l'eſtranger, que celle de leur particulier merite. Charles quint, Prince non moins aduiſé que genereux, ſ'eſt durant toutes ſes longues & heureuſes expeditions ſeruy moins ſouuent d'Eſpagnols ou d'Allemans que d'autres. Car Granuelle & Gattinare ſes principaux cōſeillers, eſtoiēt celuy-là Bourguignon, celuy-cy Piemontois. Vn chacun ſçait d'où eſtoiēt Proſper Colonne, le Marquis du Vaſt, & ces autres Capitaines qu'il a le plus vtilement employez à la guerre pour ſon ſeruice. Le Duc de Parme & le

Marquis de Spinola commis par ses successeurs à la conduite des affaires & guerres de Flandres font la même foy. Que dirons nous des Venitiens, peuple renommé d'une excellente sagesse en l'administration des choses politiques ? N'appellent-ils pas toujours un étranger au commandement de leurs armées ? Que si nous passons plus loing, nous trouverons que les Baschats, dont l'autorité est telle que nous sçauons auprès du grand Seigneur, ne sont pas Turcs naturels. Les Polonois ont depuis quelque temps tiré la plupart de leurs Roys, les uns de la Lithuanie, & de la Transilvanie, les autres de la Suisse, & de nostre France même, il n'y a pas quarante ans. Les Moscouites s'aident d'Anglois & d'Italiens, auxquels ils fient la garde de Smolenske, place frontiere, des plus importantes. Le seul exemple certes de ce braue & courageux Geneuois, qui défendit si longuement Constantinople, dont il estoit gouverneur, contre les offres & les assauts furieux de ceux qui le tiennent aujour-

d'huy , témoigne que l'homme de bien porte toujours sa vertu & generosité quant & soy , où qu'il aille , & qu'une place de consequence est quelquesfois plus fidelemēt & plus vigoureuxmēt soutenuë par ceux que l'heur d'une nouvelle dignité y a attachez, que par les autres que la naissance seule y oblige.

C'est pour répondre à quelques vns qui ne pouuans souffrir le gouuernement de la citadelle d'Amiens entre les mains d'un estrangier , jettent artificieusement dans les esprits du peuple des apprehensions du mal qui en peut aduenir. Que pleust il à DIEU, pleust-il à DIEU, que la France n'eust autre chose à craindre que ce qu'ils disent pour ce regard. Nous pourrions dormir longuement en toute asseurance. Car ie demande premieremēt ce qu'il pourroit entreprendre contre le seruice du Roy , sans se perdre , en une prouince, où il n'a presque qu'autant d'autorité qu'il plaist à un jeune, magnanime, & riche Prince, appuyé de la creance hereditaire de ses ance-

Atres, deluy en laisser. Et puis quelle
 apparence, que quand il y pourroit ce
 qu'il voudroit, il y voulust autre chose
 que ce qu'il doit? Quel honneur ou
 quel profit luy en pourroit-il reuenir?
 Ayant les belles charges que l'on voit,
 & les grandes commoditez que l'on
 croit, à quel changement se porteroit
 il, qui ne luy fust aussi dommageable
 que reprochable? Il a donné déjà à la
 France de tres-asséurez gages de la fi-
 delité en deux siens enfans; par la nais-
 sance desquels il s'est en quelque ma-
 niere enté dans le pays aux mœurs &
 loix duquel il les eleue si soigneuse-
 ment. Et pourtant ne faut-il y atten-
 dre iamais rien de luy que toutes sor-
 tes de seruices dignes des bienfaits in-
 signes qu'il y a receuz. Cessent donc à
 la fin ces menus escriuains, qui naissent
 & meurent en vn iour dans les bales
 des colporteurs, de clabauder comme
 ils font, contre celuy en la grandeur
 duquel le deuoir commun des subjets
 leur commande de venerer doucemēt
 l'autorité souueraine qui l'a establie.
 DIEU fait les Roys, & les Roys font

les grands: Et comme on ne peut violer l'obeïſſance deuë aux Roys, ſans faire iniure à DIEV qui les a instituez, de meſme ne peut-on heurter la fortune des grands, ſans bleſſer la puiffance des Roys qui les ont eleuez. Les Princes ne ſont guieres ſans quelque mignon & fauory, avec lequel ils prennent plaifir de partager comme leurs ſoucis, ainſi leurs treſors. Les exemples en ſont frequents en l'antiquité. Nos hiftoires meſmes, ſans en chercher ailleurs, nous en fourniroient, ſ'il en eſtoit beſoin, vn tres grand nombre; Mais tout le monde les ſçait. C'eſt le priuilege de Roys de pouuoir eleuer les moindres d'entre le peuple, quand il leur plaift, à vne haute fortune. Oſtez leur ceſte prerogatiue, vous leur oſtez tout ce qu'ils ont de grand diſoit vn iour Acmat à Mahomet ſon maïſtre, qui le fit depuis Baſcha d'eſtaffier qu'il eſtoit auparauant. Or ne fut ce pas en cōſideration des ſeruices qu'il en auoit receuz; Car quels les ſe peut-on imaginer en vn hōme de cettere étoffe; ains ſeulement pour dreſſer à

ses subjets en l'exēple de cette nouuelle fortune comme vne image viue du pouuoir qu'il auoit. C'est pourquoy ceux qui veulent imposer aux Souuerains la necessité de mesurer leurs faueurs aux merites de ceux auxquels ils les distribuent, demandent bien a la verité chose, ce semble, aucunement conuenable a cette iustice geometrique, qui contente plus de gens, mais non a cette puissance Royale, de qui le lustre paroît plus en obligeant qu'en recompētant. Ouurir sa bourse a ceux desquelz on a esté seruy, qu'est-ce autre chose que rendre ce qu'on doit? Payer bien, c'est la loüange d'un banquier ou d'un marchand. Le propre de la grandeur est de donner, c'est a dire, selon les anciens Iurisconsultes, de perdre. Cela deuroit suffire pour clorre la bouche a ces malcontentz, qui estimants que tout ce qu'on adioust a l'aduancemēt de quelcun leur est osté, condamnent avec enuie en la maison d'autrui, ce qu'ils adoreroient avecques ioye en la leur. Car si sa Majesté suiuant l'humeur commune des Princes

ces magnifiques, qui se plaisent autant à gratifier ceux qui ont besoin d'eux, que ceux dont ils ont besoin, a voulu preuenir par bien faicts les seruices de deux personnes qu'elle affectiōne qui le peut trouuer mauuais? Il n'y a aucun qui ne sache de quelle amitié la Reyne honore particulièrement la femme de celuy dont il s'agit maintenant. Or qui est celuy d'entre nous tant que nous sommes, lequel, s'il venoit a estre appellé par election ou autrement a quelque petit royaume étranger ne fust bien aile de communiquer quelque rayon de sa bonne fortune a vn amy qui l'y auroit suiuy, & qui n'estimast qu'on ostant à sa souueraineté ce qu'on luy osteroit de liberte de l'aduancer? Des'enquerir apres cela, comme font quelques vns, de quelles sources peut estre deriuee, & sur quels fondemens estre assise cette si estroicte bienueillance de deux si inegales testes, cela me semble n'appartenir qu'a des gens qui se donnent plus de licence dans le Cabinet du Louure, qu'ils n'en voudroient auoir laissé a vn autre dans la basse-

court de leur logis. Qu'auons nous à voir la dessus? Voulons nous faire rendre compte a nos maistres de la chose du monde, tellement la plus libre, que la captiuité ny la prison la plus rude ne la peut oster à qui que ce soit? O miserable & mal-heureuse la condition des grāds, si ce qui est permis au moindre de leurs sujets, leur est deffendu, d'aymer gratuitement! Vn Roy de Perse à autresfois chery vn arbre avec passion, & vn Empereur de Rome vne poule. Il y auoit certes de quoy s'estonner en cela d'une affection si dereglee & tout a faict prodigieuse. Mais peut on trouuer estrange qu'une Princesse veuille du bien à vne siene confidente, quel'habitude d'une commune nourriture & d'une longue conuersation aliee avec elle d'une telle conformité d'humeurs qu'il n'y a, par maniere de dire, q̃ le caractere seul de la Royauté qui les diuise? A quoy si l'on adjouste cette viuacité & souplesse d'esprit, qui reluit autant en ses actions qu'en les paroles aux yeux mesmes les plus malades d'enuie, il ne faut point rap-

porter à autres charmes la faueur de cette priuauté singuliere dont sa Majesté la caresse. Voila la cause, voila l'origine, puis que nous auons entrepris de répondre aux demandes, non seulement vaines, mais aussi impudentes de quelques vns, voila les appas, voila les hameçons de tous ces bien-faits dont l'éclat rejaillit auiourd'huy sur son mary.

Auquel ceux qui regardent de trauers le bon-heur d'autrui ne reprochēt depuis quelque temps autre chose, sinon qu'il n'a encore de sa vie tiré l'espee pour le seruice du Roy. Je crains qu'ils ne l'accusent à la fin ne trouuans que redire en ses actions, de n'auoir conduit l'auant-garde à la bataille de Cerisolles, ou à celle de Fornoüe. S'il n'a signalé jusqu'à cette heure son affection au seruice de ceux auxquels il doit ce qu'on luy enuie par quelque hardie & memorable execution, c'est faute non pas de courage, ains d'occasion. Il ne s'en est point présenté depuis quelques anneés, & Dieu vueille qu'il ne s'en presente de long

temps. La France se passera fort bien d'une telle preuve. Mais j'ay peur, j'ay peur, qu'il ne soit que trop tost contraint de la rendre, & possible sur la teste de ceux-là mesmes qui aiment mieux voir leur pais en combustion que leur voisin en prosperité. Quant à la prudence & capacité, la seule conduite de sa fortune, qui n'est pas un petit ouvrage au milieu de tant d'embusches qu'on luy dresse de toutes parts, marque assez qu'il ne manque point des parties nécessaires au maniement des affaires publiques, & qu'il peut aussi utilement servir le Roy, que son pere & son ayeul ont fait autrefois les Ducs de Toscane en plusieurs belles & importantes occasions, auprès des Papes & des Empereurs. Je sens que j'attire sur moy la colere de tous ces enuieux, qui par toutes sortes d'artifices & d'impostures calomnieuses se sont efforcez de cacher au peuple la cognoissance de son origine. Mais qu'ils petillent & grincent les dents tât qu'ils voudront, je ne defereray jamais tant à leur passion qu'à la verité,

Je sçay outre le commun rapport de tous les gens d'honneur, qui ont esté sur les lieux, ce qu'en escriuent les historiens de delà les monts, qui font vne si honorable mention de la noblesse, dextérité & fidelité de ses ancestres, qu'il n'y a que l'ingratitude seule qui puisse blâmer sa Majesté d'auoir recogneu en luy les seruices qu'ils ont rendus à vn Estat si estroittement allié avec le nostre.

Aussi ceux qui sont vn peu mieux informez des affaires, ne nient pas qu'on ne luy ait peu faire vne partie des biens qu'il a receus. Mais il y a de l'excez, disent-ils; Tout l'argent de la France fond là. Voila leurs discours ordinaires. Quels seueres contrerolleurs des liberalitez roïales! Certes s'ils auoient pris la patience d'en conferer avec celuy par les mains duquel passent toutes les finances de l'Estat (personnage dont l'enuie mesme est contrainte d'aduouer l'integrité, & d'admirer la suffisance en toutes choses) ils auroient appris qu'il en a bien passé ailleurs. On sçait ce qu'il en dit en la

Chambre du Tiers-estat dans les Augustins, lorsqu'il y fut enuoyé par sa Majesté pour communiquer l'estat des finances aux Deputez. Les charges de la maison du Roy redoublées en toutes façons depuis quatre ans, n'ont pas laissé aux fonds de ses coffres de quoy donner à celuy dont nous parlons, la centième partie de ce que crient ceux qui veulent faire du mécontentement populaire vn instrumēt de leur rebellion. Qui ne sçait, à fin que nous ne parlions point du reste, de combien a esté augmenté l'Estat des pensions tant dehors que dedans le Royaume? Mais, disent-ils, vn mal ne guerit pas l'autre; C'est encore-là vn de nos griefs. Je vous entends, possible à cause que vous n'y avez point la part que vous voudriez. Race ingrate & temeraire, qui mesurant l'autorité de sa Majesté à vostre profit, condamnez avec tant d'audace les causes dont vous sauourez chacun iour avec tant de felicité les effects. Car qui doute que cette profonde paix, en laquelle nous auons si douce-

ment vécu jusqu'à cette heure, ne soit le fruit de cet argent qu'on a semé par les provinces dans les bourses des plus puissants & plus remuants ? Ce que si nous auions bien considéré, nous louerions avec admiration la preuoyance & sagesse incomparable de cette Princesse, qui par la distribution extraordinaire de quelque million a contenu les choses en l'estat le plus paisible qu'il se pouvoit souhaitter ; Toutes ces liberalitez qu'elle a faites ont esté autant de chaînes d'or qui ont arresté jusqu'à cette heure les mouuements dont tant de plaintes seditieuses commencent à nous menacer. Inuention beaucoup plus vtile que celle du cerf de Nongent. Il y a quelques fois du gain à perdre, & ne se trouue point de rentes plus asseurees aux Roys que celles que leur munificence se constitue sur les affections de leurs sujets.

Leurs gratifications portent leur interest en temps & lieu. Et peut-on dire que comme les arteres du corps, ainsi les mains du Prince s'emplissent en se dilatant. Car ce qu'ils donnent

cette année à ceux qui sont autour d'eux, y retourne l'autre par le moyen des leuees qu'ils font sur ceux auxquels il a passé depuis. Tout reuient à vn.

Ie pensois auoir suffisamment répondu aux plaintes de nos malcōtens en ces deux ou trois poincts sur lesquels ie viens de parler. Mais on n'a iamais fait par la raison avec des gens qui cherchent querelle. Les voila qui eleuent de nouueaux cris. Ecoutons vn peu ce qu'ils veulent dire. Ils adjoûtent que le restene va pas mieux. Et là dessus declament avec vne egale vehemence & liberté contre les defordres & corruptions, dont ils font, dont ils sont eux mesmes la plus grande part. Mais à quel propos tout cela? Qui de nous ne les recognoit, ne les condamne? Par tout ou il y a des hommes, il y a des defauts & les estats n'estants qu'une société ciuile d'hommes viuants sous vn même gouuernement ne peuuent qu'ils ne se ressentent des manquements de ceux dont ils sont composés Quel peuple, quel siecle ne s'est plainct des siens? Il y en
a tou

a tousiours eu & il y en aura tousiours.
 Quoy donc? Suffit-il de les mōstrer au
 doigt & puis les laisser là? Nullement.
 Il en faut chercher les remedes plus
 conuenables. Ce sont les Estats. Qui
 ayants esté solennellemēt conuōques
 par sa Majesté & occupés durant plus
 de quatre mois à la reformation de
 nos abus, rendent toutes sortes de
 plainctes seditieuses & criminelles ail-
 leurs qu'en leurs cayers. Ceux qui en
 ont eu communication sçauent qu'ils
 n'y ont rien oublié. C'est à nous main-
 tenant d'attendre avec humilité & pa-
 tience ce qu'il plaira au Roy d'y ré-
 pondre. Il l'a des-jà faict sur certains
 poincts les plus importants, affin de
 donner aux deputés auant leur depart
 quelques arrhes de son affection au
 soulagement du peuple. Nous auons
 tout subiect d'esperer qu'il taschera
 de contenter ses subjects en tout le re-
 ste leplustost qu'il luy sera possible. Il
 fera ce qu'il pourra dés à cette heure,
 ce qu'il ne pourra pas, il le remettra à
 vne autrefois. Toutes mutations sou-
 daines en vn Estat sont dangereuses.

Rien ne se faiet vtilement que par degrez. La prudence humaine conduit les grands ouurages, comme la nature, par des progres occultes & insensibles. Nous aurons à la fin, ie m'en assure, ce que nous demandons. Vn peu pluistost ou vn peu plus tard, c'est ce que nous auons à desirer ou à craindre en cecy. Et quand quelque mauvais Genie inspireroit à ceux qui manient les affaires sous l'autorité de nostre ieune Prince, quelques mouuements extraordinaires, éloignez du bien public, il ne nous reste rien qu'à ployer doucement sous le joug & deplorer nostre malheur en silence. Car de se mettre aux champs là dessus, & d'opposer la force à l'autorité Souueraine, comme quelques vns semblēt desirer; malheur à quiconque y songera seulemēt. Il n'y a rien que nous ne deuions souffrir auant que d'en venir là. Ie le diray encore vne fois, à fin que toute la Frāce m'entende; Il n'y a rien que nous ne deuions souffrir auant que d'en venir là. Car si nous sommes aussi viuement touchez du desir d'une serieuse reformation, comme nous en

faisons contenance, hélas ! que la guerre n'en est pas le chemin. Qui dit la guerre, dit l'abbregé de toutes sortes de malheurs. Nous nous plaignons de la venalité des Offices, comme c'est de vray l'une des plus grandes corruptions de cest Estat : mais croyons nous que la mesme cause qui l'a introduitte soit le moyen de la reuoquer ? Car on sçait que les dépenses excessiues de nos querelles d'Italie contraignirent premierement Louys XII. & puis François I. son successeur d'auoir recours à cete inuention pour subuenir à la necessité publique. Nous crions que les finances du Roy sont épuisees, hé ! peut il tomber en la pensee de quelcun que la chose du monde qui couste le plus à entretenir les puisse iamais accroistre ? Vne seule leuee de Suisses diminuë plus l'Espargne dans six mois que ne fait la faueur du plus auare mignon dans six ans. Celui cy s'accommodera de quelque reste, ou de quelque chappe cheute, à ceux-là il en faut trouuer y en ayt-il ou non, autrement ils vous laissent au besoin. C'est à ceux qui ont

vescu durant les guerres ciuiles a par-
 ler de cela. N'est-ce pas chose estran-
 ge que les troubles de la Religion ayent
 consume dans ce Royaume plus de
 cent cinquante millions pour le paye-
 ment seul de la gendarmerie? Cela fut
 verifie l'an 1576 aux Estats de Blois.
 On adjoutoit à cela neuf villes, quatre
 cens villages, & dix mille maisons tout
 à fait brulees ou rasees, sans compter
 celles qui auoient esté a demy ruinees
 en nombre de plus de deux cens mil-
 le. Les deputez de chaque gouuerne-
 ment y représenterent les procez ver-
 baux des Officiers particuliers, par les-
 quels il paroissoit pres de vingt mille
 femmes ou filles auoir esté forcees du-
 rant ce temps là en diuers endroits.
 Qui eust peu tenir le compte de tant
 de meurtres, de tant de pilleries, de
 tant de trahisons, de tant de perfidies,
 & de tant de cruautéz lamentables
 qui s'y commirent avec la mesme li-
 cence & barbarie? Tout cela combien
 éloigné du restablissement de cette
 pieté, de cette iustice, & generale-
 ment de toutes ces vertus apres les-

quelles nous faisons tous semblant de
 soupirer ? Que veulent donc dire ces
 boute-feux qui par leurs escrits sedi-
 tieux excitent le peuple à rechercher
 par cette voye le soulagement qu'il
 desire ? O malheureux qui pensans re-
 bâtir vos maisons des ruines publi-
 ques, mettez en tant qu'en vous est, le
 feu en vostre patrie, & vous prenez à
 vostre Roy. Car vous auez beau pro-
 tester que ce n'est qu'à ses ministres
 que vous en voulez, nous sçauons
 que tous ceux que leurs passions ont
 autresfois armé dans l'Estat ont tas-
 ché de courir leurs mauuais desseins
 de cette aussi faulx que specieuse cou-
 uerture. J'aimerois autant qu'on me
 dist qu'on benit le Soleil, comme ou-
 rage de Dieu, mais qu'on en maudit
 & deteste les rayõs. Car que sont ceux
 auxquels vous faictes mine de vous
 prendre que des rayons de l'autorité
 souueraine du Prince ? Les coups qu'on
 frappe sur eux rejallissent sur luy. Et
 qu'on ne nous mette point icy le Par-
 lement en auant. Le Loure & le Pa-
 lais se trouueront tousiours d'accord

au besoin pour s'opposer à toutes for-
 tes de factions. Quiconque entrepren-
 dra de leuer les armes sous quelque
 pretexte que ce soit sans exprez com-
 mandement de leurs Majestez, n'aura
 point de plus rigoureux & de plus ru-
 des aduersaires que ceux qui ayants
 l'administration de la iustice Royale
 en depost, sçauēt qu'elle n'a rien de si
 ennemy ny de si contraire que la diui-
 sion, & la sedition. Et sçachent tous
 ces mutins quels qu'ils soient, que la
 force demeurera tousiours au maistre
 de quelque costé qu'ils l'assailent.
 Tout ce qu'il y a de grand, de braue,
 de genereux dās la France s'vnira tout
 aussi tost sous les enseignes Royales
 pour les aller foudroyer à la premiere
 rencontre. Car de s'imaginer que
 Mōsieur le Prince fortifie iamais de sō
 autorité telles menees, c'est faire tres
 grand tort à sa prudence, tres-grand
 tort à sa fidelité. Ceux qui le cognois-
 sent biē n'aurōt iamais cette opinion.
 C'est Mercure qui peut biē s'eloigner
 du Soleil de quelques degrez, mais nō
 iamais s'opposer à sa lumiere. Mesme
 iugement doit on faire de ceux de la

religion. Car bien que ces nouvelles alliances leur dōnent vn peu d'ombrage, si n'ōt ils garde pour tāt de s'eschapper là dessus, de peur de verifïer ce que l'Empereur Maximilian II. auoit accoustumé de dire d'eux, qu'ils mesuroient leur obeïssance non à la raison, ains à leur fantaisie. Ils ont autresfois condāné & iustemēt cōdamné les apprehensiōs de ceux qui s'étoiēt liguez pour netōber sous la dominatiō d'vn Roy de religion cōtraire. Commēt se pourroiēt-ils iustifier, s'ils auoiēt maintenāt opposé leurs armes à l'ētree d'vne Espagnolle en France, de crainte qu'elle n'y apporte l'Inquisition. Crainte qui ne peut tomber qu'en quelques esprits foibles, qui ne sçauēt pas que les humeurs des peuples estans diuerses, requierent aussi diuerses loix & diuerses polices. Cette liberté qui est nee avec nous ne sçauroit souffrir ces Sambenits & ces Garruches dont on nous veut faire peur. Nous auons l'experience des siecles passez si chèrement achetee. Elle nous a appris que la pureté de la Foy est vn don de celuy qui autheur de la paix, ne veut point

de sacrifices forcez. La seule conference de Fontainebleau nous a rendu plus d'hommes que toutes ces furieuses & hideuses batailles qui nous ont fait épandre plus de sang que la conquête de toute l'Asie ne nous en eust possible cousté. Et pourtant ne faut-il pas auoir peur que tous nos voisins ayēt iamais assez d'artifices pour nous faire retōber en ces malheurs, si nous mesmes commençans à nous ennuyer de nostre repos, ne faisons de cette legereté qui est fatale à nostre nation, la planche aux calamitez que nous apprehendons. C'est à nous à y prendre garde de bonne heure, rejettants prudemment toutes ces propositions seditieuses que l'on commence à semer dans le peuple, & preferans aux furieuses predictions d'une fausse Cassandre les sages conseils de cette P I T H A R C H I E, que les anciens, pour nous faire entendre combien est utile aux Estats l'obeissance des sujets aux puissances superieures, nous ont appris estre femme de Iupiter Sauueur & mere de la Felicité publique.

F I N.

